

## MISTERIOS LUMINOSOS

*(Sei reza iha Quinta feira)*

Hodi Padre..

**Intro:** Maluk sira, Bispo Fulton J. Sheen dala ida dehan nune'e. " Wainhira remata orasaun Tersu Missionaro nian, ita hakuak tiha ona kontinente tomak no ema hotu presente iha orasaun ida nee. Mai ita reza Tersu Missionariu ho laran manas no hala'o mandato Missionariu Maromak nian, ita nia kna'ar serbi nian ho ksolok.

**Orasaun:** Aman laran diak, Ita bolu no haruka ita nia Kreda atu halo moris Ita nia reinu iha mundu raiklaran, hodi haklaken rahun diak Evanjelu nian no luta ba kriasaun tomak nia diak. Hamutuk ho Maria Virjen Ita Oan Jesus Kristu nia inan, ami harohan halakan laran manas misionaria sarani sira nian. Haforsa no tulun ami atu badinas nafatin hodi serbisu hamutuk no kreativu haklaken ita Lia Foun Diak iha povu sira nia le'et, liu-liu iha momentu Covid-19 ida ne'e. **Ami harohan ne'e hodi Na'I Jesus Kristu Nia naran hamutuk ho Espirito Santo. Amen**

**Misterio 1:** Ita sei hanoin katak João Baptista sarani Jesus iha mota Jordaun. *(Tersu musan kinur ba Asia)*

Simu tiha baptismu, Jesus sai housi be; lalehan nakloke, Nia hare Maromak nia Espiritu hanesan manu falur ida tun mai iha nia leten. Housi lalehan lia ida dehan: "Ida ne'e mak ha'u nia Oan doben, ne'ebe fo ksolok mai ha'u."

### **Ita reza ba Kontinente Asia (Nonok oituan)**

**Orasaun:** Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Asia, ne'ebé hetan problema oin-oin iha sira nia moris, liu-liu sira ne'ebé laiha hela fatin, ekonomikamente hetan situasaun a'at liu, tradisaun no moral, la rekoñese sira nia direitu umanu; haraik ba sira forsa, laran manas, no atu sira nafatin fiel no metin iha fiar no ba Ita nia hakarak. Halo sira aprende no hetan kbi'it husi Ita Oan Jesus. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

*Ami Aman, Ave Maria 10, Gloria*

**Misterio 2:** Ita sei hanoin katak Jesus tuir festa kaben iha Kana. *(Tersu musan azul ba Oseania no Australia)*

Hodi Na'i Feto ninia intervensaun, Jesus halo milagre nakfilak we ba tua. Ne'e mak milagre uluk ne'ebé Jesus halo iha Kana Galileia. Nia hatudu nia gloria, nia eskolante sira fiar Nia.

### **Ita reza ba Kontinente Oseania no Australia**

**Orasaun:** Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Oseania no Australia. Atu sira ne'ebe hetan persegisaun tanba sira nia fiar, Ita Bo'ot haraik kbi'it no konsolasaun. No ba martir (mate mean sira) ne'ebe defende fiar no mate tan ema oho sira iha kontinente Australia no Oceania durante funu mundial daruak nian, atu fini fiar nian ne'ebé sira kuda tiha ona sei la para maibe buras nafatin. Continua tulun sarani sira atu fiel hodi moris tuir vokasaun nu'udar Kristu nia dixipula, maski tenke terus wain tanba sira nia fiar. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

*Ami Aman, Ave Maria 10, Gloria*

**Misterio 3: Ita sei hanoin katak Jesus la'o lemo rai haklaken Maromak nia Reinu. (Musan kor mutin ba Europa)**

Houri oras ne'e, Jesus hahu hanorin hodi dehan: "Imi hakribi imi sala ba, basa reinu lalehan nian besik dau-daun ona." Hafoin Nia hahu la'o lemo Galileia tomak hodi hanorin iha Sinagoga sira, haklaken liafuan diak reinu nian no fo isin diak ba moras sira iha povu nia leet.

**Ita reza ba kontinente Europa**

**Orasaun:** Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Europa, atu Kristaun sira hotu ne'ebé hetan persegisaun tanba fiar, ema hewai, ema la fo folin ka la konsidera, hetan kbi'it, konsolasaun, metin iha tentasaun, no iha esperansa foun. Atu naroman Evanjelu nian bele haroman no gia ain hakat hotu moris loron-loron nian, atu sira metin iha tentasaun oin-oin ne'ebe sira hasoru. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

*Ami Aman, Ave Maria 10, Gloria*

**Misterio 4: Ita sei hanoin katak Jesus nakfilak An iha foho Tabor. (musan mean ba Amerika)**

Iha neba Nia nakfilak An iha sira nia oin. Nia oin nabilan hanesan loron, nia unuk sai mutin hanesan roman. Nia sei koalia hela, kalohan nabilan ida hamahan sira. Hafoin housi kalohan ne'e lia ida dehan: "Ida ne'e mak Ha'u nia Oan doben, ne'ebé fo ksolok mai ha'u. Imi rona Nia ba!"

**Ita reza ba kontinente Amerika**

**Orasaun:** Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Amerika, atu sira bele haka'as an no ho fiel lori kruz iha mundu ida ne'e nia realidade. Halo sira kuñese tebes Ita Oan Jesus, liu-liu iha ninia Misteriu terus nian. Atu Ita nia sarani sira iha Amerika bele hasoru duni Jesus ne'ebe moris, nu'udar dalan ba konversaun, fraternidade no solidaridade. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

*Ami Aman, Ave Maria 10, Gloria*

**Misterio 5: Ita sei hanoin katak Jesus han ba dala ikus, hodi hari Eukaristia. (Musan verde ba Afrika)**

Sira han dau-daun, Jesus kaer paun, fo bensa hodi silu no fo ba Nia eskolante sira dehan, "Imi simu ba. Ne'e Ha'u nia isin." Tuir mai, Nia foti kalis, fo agradese no fo ba sira. Sira hotu hemu. Jesus dehan ba sira, "Ne'e Ha'u nia ran, ran aliansa nian, nebe sei nakfakar tamba ema lubun boot.

### **Ita reza ba kontinente Afrika**

**Orasaun:** Aman Maromak, hamutuk ho Maria Inan Evanjelizasaun nian, Inan nasaun tomak nian, ami harohan ba sarani sira iha kontinente Afrika, ba sira ne'ebé la hetan atensaun ba sira nia dignidade no direitu pesoal, sira ne'ebé hamlaha no sira ne'ebé hamro'ok atu hetan moris ne'ebé diak liutan. Atu Ita nia Kreda bele haka'as an manan lialos ba sira, difende sira ne'ebé ema hewai, terus, sira hotu ne'ebé lian laiha, no la hetan sira nia direitu. Amen

O Maria, Inan Evanjelizasaun nian, Inan nasaun tomak nian, harohan no tau matan mai ami ita oan sira

*Ami Aman, Ave Maria 10, Gloria*

**Orasaun Final:** Aman, hun domin nian, ami agrade se ba tersu missionariu ida ne'e. Atu hodi Ita nia grasa, ami sai atenbrani liutan hodi haklaken Ksolok Evanjelu nian no bele to'o iha moris fraterna loron-loron nian. Halakan ahi domin nian ba ami nia maluk sira to'o ami bele sai ida iha moris rohan laek. **Ami harohan ne'e hodi Ita nia Oan Jesus Kristu, Nia naran hamutuk ho Espirito Santo. Amen**

(Ámbitu Misaun)